

Takornariaqarneq aallaavigalugu ilinniarfiusinnaasumik Ilulissani ilinniartoqarfimmik pilersitsinissamut aalajangiisoqarsinnaanissaanut tunngavissanik Naalackersuisut misissuinissaat pillugu Inatsisartut aalajangiiffigisassaattut siunnersuut. Ilinniartoqarfik minnerpaamik serviceøkonom, Arktisk Turistguide aamma Adventure Guide ilinniakkatut pigissavai. Misissuineq kingusinnerpaamik UKA 2023-mi Inatsisartunut tunniunneqassaaq. (Inatsisartunut ilaasortaq Nivi Olsen, Demokraatit)

Akissuteqaat

Ilinniartitaanermut, Kultureqarnermut, Timersornermut Ilageeqarnermullu Naalackersuisoq.

Siullermeerinnineq

Naalackersuisut sinnerlugit aalajangiiffigisassatut siunnersuut pillugu Inatsisartuni ilaasortaq Nivi Olsen, Demokraatit, qutsavigerusuppara.

Ilulissani ilinniarfimmik pilersitsinissaq pillugu misissuineramik suliaqartoqassasoq, kiisalu misissuinermi takornariaqarnermut tunngasut ilinniarfiit qitiutinneqassasut Naalackersuisut isumaqataapput.

Novemberip aqqarnganni 2021-mi Inatsisartut ukiaanerani ataatsimiinneranni immikkoortoq 95-ip aamma immikkoortoq 107-ip aappassaaneerpeqarnerani ataatsimiititaliaq allannguutissamik siunnersuummik, kingorna Inatsisartunit akuersissutigineqartumik, ima ittumik saqqummiussivoq:

”Kommune Qeqertalimmi aamma Avannaata Kommuniani ilaatigut GUX-imik, inuussutissarsiutinut ilinniarfinnik qaffasinnerusumillu ilinniarfinnik pisariaqartitsinernik, periarfissanik kingunerisassanillu qulaajaaviusumik UPA23-mut misissuineramik suliaqaqqullugit Naalackersuisut peqquneqarnissaanik Inatsisartut aalajangiiffigisassaattut siunnersuut. Misissuinermi kommunit ilinniarbitaanerillu attuumassutillit, kiisalu ilinniartitaanermut tunngasuni misilittakkat suliniutillu ingerlasut sapinngisaaq tamaat ilaatinneqassapput.”

Misissuineramik suliaqarnissaq siunnersuutigineqartoq misissuinermut ingerlareersumut ilanngunneqassasoq isumatusaarnerpaassasoq Naalackersuisut nalilerpaat. Immikkoortoq 95 aamma immikkoortoq 107 pillugu misissuineq massakut ingerlanneqarpoq, misissuinerullu inerneru 2023-mi Inatsisartut upernaakkut ataatsimiilerpata saqqummiunneqassapput.

Aammattaaq Naalackersuisut eqqaassavaat Campus Kujalliup ilinniakkat serviceøkonom, arktisk turistguide kiisalu adventure guide neqeroorutigisarmagit.

Naalackersuisut taamatut oqaaseqarlutik allannguutissatut siunnersuut ima ittoq saqqummiutissavaat:

“Ilulissani ilinniarfimmik pilersitsinissaq pillugu Naalackersuisut misissuineramik suliaqaqqullugit peqquneqarnissaanik Inatsisartunut aalajangiiffigisassatut siunnersuut. Ilinniarfiup minnerpaamik ilinniakkat Serviceøkonom, Arktisk Turistguide aamma Adventure Guide neqeroorutigissavai. Misissuineq immikkoortoq 95-imut aamma immikkoortoq 107-imut misissuinermut ingerlareersumut ilaassaaq, kingusinnerpaamillu Inatsisartut 2023-mi upernaakkut ataatsimiilerpata tunniunneqassalluni.”

Misissuinissamut siunnersuut misissuinermit ingerlareersumut ilanngunneqassappat aningaasatigut kinguneqassangilaq, projektlederimut aningaasat illikartinneqareersimasut eqqaassanngikkaanni.

Misissuineq nutaaq misissuinermit qulaani taaneqartumut attuumassuteqanngitsoq ingerlanneqassappat aningaasatigut kinguneqarsinnaavoq. Taamaattoqassappat AC-tut ukiumut atorfik ataaseq atorneqassaaq, taannalu 500.000 koruuninik naleqarpoq.

Taamatut oqaaseqarlunga Naalackersuisut sinnerlugit allannguutissatut siunnersuut Inatsisartuni suliassanngortippara.